

**Amanat Merdeka Perdana Menteri Perlu Dihayati Demi Pembangunan Negara
Bernama
August 30, 2014**

KUALA LUMPUR, 30 Ogos (Bernama) -- Amanat Merdeka yang disampaikan Perdana Menteri Datuk Seri Najib Tun Razak malam ini perlu dihayati semua rakyat dalam usaha menuju negara maju.

Menteri Pengangkutan Datuk Seri Dr Liow Tiong Lai yang juga Presiden MCA berkata amanat merdeka Najib perlu dihayati supaya solidariti rakyat dapat memberi kekuatan kepada pembangunan negara.

"Kita (kerajaan) harap rakyat dapat bersatu padu dan memberikan sokongan agar kita dapat melaksanakan transformasi negara dengan secepat mungkin menjelang 2020," katanya.

Menteri Perdagangan Dalam Negeri, Koperasi dan Kepenggunaan Datuk Seri Hasan Malek berkata tiga amanat merdeka yang ditekankan Najib perlu menjadi amalan rakyat dalam usaha menjayakan matlamat Malaysia menjadi negara maju.

"Kita kurangkanlah bercakap dan bersama-sama untuk membantu kerajaan dalam mempersiapkan Malaysia menjadi sebuah negara maju menjelang 2020," katanya.

Mereka berkata demikian ketika mengulas Perutusan Hari Kebangsaan ke-57 Najib malam ini, yang antaranya menggariskan tiga amanat merdeka dalam mengukuhkan solidariti rakyat, memupuk keyakinan rakyat serta mewariskan sebuah Malaysia yang makmur lagi sejahtera.

Menteri Sumber Manusia Datuk Seri Richard Riot Jaem pula berkata mesej yang disampaikan oleh Najib mudah difahami dan sungguh bermakna serta beliau yakin semua rakyat termasuk di Sabah dan Sarawak faham amanat itu.

"Ketika PM mencadangkan supaya kita meletakkan tangan kanan di dada kiri dengan penuh semangat kemerdekaan, itulah saat yang paling bermakna," katanya.

Menteri di Jabatan Perdana Menteri Datuk Seri Shahidan Kassim berkata kesepaduan dan keharmonian menjadi elemen utama yang perlu dipupuk dalam kalangan masyarakat tanpa sebarang kompromi.

Menteri di Jabatan Perdana Menteri Datuk Dr Wee Ka Siong pula berkata semua rakyat perlu komited dalam membantu memakmurkan negara.

"PM juga mengajak rakyat supaya bersama-sama menghadapi sebarang dugaan dengan bersatu padu," katanya.

-- BERNAMA

Copyright © 2014 BERNAMA

Source :<http://www.bernama.com/bernama/v7/bm/newsindex.php?id=1064874>